

## 洪頤煊筠軒遺文輯存

陳鴻森\*

### 提要

洪頤煊（1765—1837A.D），字旌賢，號筠軒，晚號倦舫老人，浙江臨海縣人。嘉慶六年拔貢。頤煊研精經訓，貫串子史。嘉慶初，阮元為浙江學政，與弟震煊同以治經受知，時有二洪之目；嘗與修《經籍纂詁》。後館孫星衍山東督糧道署七年，孫氏撰《尚書今古文注疏》，頤煊助其搜討；平津館所刻書，多賴之校讐焉。年五十後，宦遊嶺南，署廣東新興縣事，適阮元總督兩廣，延之入幕，諏經諮史以為常。《清史列傳》卷六十九、《清史稿》卷四八六、《清儒學案》卷一二三有傳。

洪氏博通經史，撰著甚豐，其著者有《孔子三朝記注》、《經典集林》、《平津讀碑記》、《諸史考異》、《管子義證》、《讀書叢錄》等，多戛戛獨造之說。顧聲聞未著，事蹟日就湮霾，余近尋討遺聞墜事，纂為《洪頤煊年譜》一編，以備知人論世之資；復由群籍蒐輯佚文，錄為此篇，以補《筠軒文鈔》之闕焉。

**關鍵詞：**洪頤煊 筠軒文鈔 輯佚 乾嘉學術

---

\* 中央研究院歷史語言研究所研究員，成功大學、中央大學中文系合聘教授。

# **"Yi Xuan Yun Xuan Hung Compilation left text"**

**"Hong-Sen Chen"**

**"Summary"**

Hung Yi Xuan (1765-1837), the word Jing Yin, Yun Xuan number, Dusk tired old Fang, Zhejiang Linhai County. Six bagong Jiaqing. Jing Yi Xuan study by the Institute, throughout sub-history. Jiaqing early as Zhejiang Jiangxue Zheng Ruan, Zhen Xuan and younger brother to rule the same experience to know, when the second flood of the head; to try and repair "by Ji Zhuan Gu. " Governor of Shandong after the House Sun Xingyan grain Road Department for seven years Sun essays, "chancery present and ancient commentaries, " Yi Xuan help them search discussion; Pingjin carved Museum book, and more rely on the school Qiu Yan. Fifty years after the official all Lingnan, Xinxing County, Guangdong Department of things, the Governor of Guangdong and Guangxi Ruan appropriate, extension of the entry screen, pick through the history of thought often consultative. "Qing Biography " Juan Liu nineteenth, "History of Qing Dynasty" volume IV eighty-six, "Qing Confucian Scholars, "Volume two or three have passed. Hung Broadcom classics, history, Author of the very rich, the author of "Confucius note three dynasties in mind, ""classic set of forest ", "Pingjin read tablets ", "all Sculley differences ", "pipe Explanation ", "Reading Cong recorded "And so made more independent of Jia Jia said. Gu Shengwen not the deeds on to submerged haze, I left almost smell the fall to find something to discuss, compile the "Chronicle of Hung Yi-Hsuan, " a series to prepare for the world of information on Appreciating; complex by the group membership search COLLECTIONS text, recorded as Cipian To complement the "Yun Xuan Wen Chao, " the Que Yan.

嘉慶初，洪頤煊及弟震煊以古學拔起浙東。阮元提督浙學，極賞異之，檄調赴杭，入敷文書院肄業；嘗分纂《經籍纂詁》，與兩浙經古之士上下其議論，時有大小洪之目；而頤煊博綜群籍，考據明審，其名尤著。《清史列傳》卷六十九、《清史稿》卷四八六、《清儒學案》卷一二三有傳。

頤煊勤苦力學，著書滿家，其著者有《禮經宮室問答》二卷、《孔子三朝記注》八卷、《諸史考異》十八卷、《平津讀碑記》並續十二卷、《管子義證》八卷、《讀書叢錄》二十四卷、《經典集林》三十二卷、《筠軒文鈔》八卷等。嘗佐孫星衍山東督糧道幕，平津館所刻書，多賴之校讐焉。孫氏撰《尚書今古文注疏》，頤煊助其蒐討，並為撰《鄭康成年譜》、《孫氏祠堂書目》、《平津館鑒藏書籍記》等。<sup>1</sup>

頤煊考訂之學，極為當時名宿所推重。翁方綱金石之學擅名當代，於人不輕許可，獨稱頤煊《讀碑記》其用意之精密，蓋錢大昕《潛研堂金石文跋尾》之亞也。<sup>2</sup>《續修四庫提要》亦稱頤煊《讀書叢錄》考訂精審，「方之錢氏竹汀、王氏石臞，殆亦無多讓焉」。<sup>3</sup>日本武內義雄教授尤稱渠以「《禮記·雜記》之公羊賈，即《論語》之公明賈；《春秋》家公羊高，即《孟子》所云公明高」之說，為開啟千古之秘。<sup>4</sup>顧頤煊久為人佐幕；五十以後，宦遊粵東，地遠官卑，聲聞未著。余近於暇間尋討遺聞墜事，纂為〈洪頤煊年譜〉一編，以備知人論世之資。復從群籍蒐輯佚文，錄為是編，以補《筠軒文鈔》之缺。<sup>5</sup>其弟震煊未有文集，遺文除〈夏小正疏義序〉外，俱見《詒經精舍文集》，今不具錄。

<sup>1</sup> 參拙作〈洪頤煊年譜〉附〈著述考〉，2009年，《中央研究院歷史語言研究所集刊》80本4分，頁691—771。

<sup>2</sup> 翁方綱〈平津讀碑記序〉，洪頤煊《平津讀碑記》，《傳經堂叢書》本，卷首，頁1。

<sup>3</sup> 《續修四庫全書總目提要》，1996年，濟南：齊魯書社，三十五冊，頁580。

<sup>4</sup> 武內義雄《論語の研究》，《武內義雄全集》本，1978年，東京：角川書店，頁142。

<sup>5</sup> 按洪頤煊《筠軒文鈔》，嘉慶九年原刊本止四卷；道光間，增為八卷，有《傳經堂叢書》本、《邃雅齋叢書》本。張舜徽《清人文集別錄》卷十二極稱之，並謂頤煊「一生研精群經、小學、諸子、史漢，自抒心得，悉薈萃于《讀書叢錄》二十四卷中，與是集實相表裏也。」

## 目次

- 禮經宮室答問自序  
諸史考異自序  
讀書叢錄自序  
平津讀碑記自序  
平津讀碑續記識語  
台州札記自序  
倦舫書目自序  
筠軒詩鈔自序  
詩經廣詁序  
宋刻金石錄跋  
漢學諧聲跋  
國朝名人詞翰跋一  
國朝名人詞翰跋二  
孫淵如觀察往還書札跋  
文林郎陝西扶風縣知縣宋君墓

## 禮經宮室答問自序

《禮經》莫大於宮室，宮室不明，則古人行禮之節，周旋升降，皆茫然莫知其處，此議禮所以如聚訟也。宋李如圭撰《釋宮》，已撮舉其凡；近人復多考證，核以經文，亦有未密。

余思古人宮室制度，與今人不甚相遠。時淳世樸，廟寢明堂，不如後人之千門萬戶。細繹《禮經》，皆有丈尺可尋、名位可辨，因撰《宮室答問》二卷，冀好學深思之士之有以是正其得失焉。嘉慶壬申三月五日，臨海洪頤煊識。（錄自洪氏本書卷首）

## 諸史考異自序

國史成於眾手，其譌舛固所不免。厥後篇帙浩繁，校刊匪易，輾轉改變，譌謬滋多。嘉定錢氏大昕撰《廿二史考異》，參互考校，精審不苟。余向亦留心史學，《史記》、兩《漢》三史，間有所見，已載入《讀書叢錄》中。

戊子冬杪，自粵歸里，寒廬多暇，復取《三國志》，以迄《南、北史》，條其異同，辨其得失，成《諸史考異》十八卷。撲塵掃葉，聊補錢氏之闕。海內倘有好學深思之士，薈粹群本，擇善而從，刊一定本，斯亦不朽之盛業也。道光十六年太歲丙申八月七日，臨海洪頤煊撰，時年七十有二。（錄自洪氏本書卷首）

## 讀書叢錄自序

余受性椎魯，寡所嗜慕。少年讀書里中藏書之家，借覽無虛日。及壯，遨遊吳越，來往燕齊，謁通德之門，窺禮堂之奧，左右采獲，漸成撰述。五十以後，始抵粵東，一官匏繫，非吾所好。趨走之暇，閉門卻掃，於是重取經史百家，朝研夕稽，證其異同，辨其得失，以聲音文字通其原，以轉寫譌舛窮其變，勿敢嚮壁虛造，勿敢勦襲陳言。淺見眇聞，聊以自適。後之覽者，其或諒斯。道光元年十二月廿一日，臨海洪頤煊識。（錄自洪氏本書卷首）

## 平津讀碑記自序

淵如師喜金石文字，生平游歷所至，搜訪無虛日。德州平津館所藏碑，自周秦至唐末五代，凡廿餘匣。庚午冬，頤煊始取而讀之，見諸君題跋未盡，閒有所獲，輒錄於左方，積成八卷，題曰《平津讀碑記》，示所從得也。

昔家文惠公嘗假石邦哲、王順伯兩家之碑，撰《隸釋》、《隸續》，流傳至今。頤煊少賤，不能備金石之藏；游幕平津，始得盡見海內所有之碑，雖才遠不及文惠，所遇殆或過之。

夫世之所貴乎金石者，以其足取證經史也。聖賢經傳，微言奧義，典籍散亡，往往得自學士之摛詞、家狀之續述。至國家易代，修史或采自傳聞，或成于眾手，殘舛譌闕，勢不能免，尤不若金石之出于當時為可據。其他如六書之通轉，文體之宗尚，皆可於是窺其崖略，此其學所以日積而日昌也。

今世之為是學者，有錢少詹《潛研堂金石文跋尾》、翁閣學《兩漢金石記》、阮中丞《山左金石志》、王少寇《金石萃編》、武大令《授堂金石跋》，皆海內尊向。頤煊獲讀是碑，復得從諸君後，以商榷其是非，則亦可以自慰也已。嘉慶十六年太歲在未八月十四日，臨海洪頤煊題于濟寧舟次。（錄自洪氏本書卷首）

### 平津讀碑續記識語

余近年搜藏碑刻，頗有出於前編所未見者，今並作《續記》附於後。嘉慶二十一年三月十七日，臨海洪頤煊識於羊城官舍。（錄自洪氏本書卷首）

### 台州札記自序

台州文獻，陳寔憲《嘉定赤城志》尚矣，嗣是吳子良撰《續志》，林表民撰《三志》，元楊敬德撰《赤城元統志》，其書皆不傳。至明成化間，謝方石祭酒撰《赤城新志》，體例悉依舊志，惟沿宋末講學流派，高談心性即是偉人，文學、政事略置弗論。近人補輯，又染明人習氣，引書好改頭換面，如自己出，使人無所依據，識者病之。

余髫年喜聚台州掌故，後游學四方，棄去弗錄。迨戊子自粵歸里，舊稿散佚，諸老友交相勸曰：「君留心有年，與其沈於胸中，盍若垂諸簡牘，使後之修志乘者得所取材，不亦善乎！」於是重為蒐輯，略加考證。宋元以前，擇其雅馴足補郡志之闕者，編為十二卷，題曰《台州札記》。凡近人府州縣志，以及諸家族譜所載鄉里傳聞，不敢闌入。

同邑郭石齋茂才亦留心桑梓，每來城過訪，必劇談終日。余笑語曰：「君今之林表民，媿余非陳寔憲，拾遺補闕，俟君異日續成之可也。」併以識諸簡端。道光十三年太歲癸巳十月廿六日，臨海洪頤煊識於小停雲山館，時年六十有九。（《續修四庫全書》影印洪氏稿本卷首）

### 倦舫書目自序

書猶海也，汎海者不必涉十洲三島，以窮海之量；藏書者亦不必盡《八索》、《九邱》，以求書之全，各隨其力之所能到。而汪洋萬頃，亦足以開盪心胸；學者圖書萬卷，三冬經史足用，得以多識前言往行，亦足自豪，正不必探頤索隱，多文以為富也。

予少年卽好聚書，台州僻處海濱，聞見有限。後飢驅四方，館孫淵如觀察德州使署七年。觀察富於藏書，屬予撰《孫氏書目》；又取宋元版本并明刻之佳者，撰《平津書記》，於是盡窺書之藩籬。其時予空囊如洗，十指如錐，不能繕錄副本，徒有望洋而已。迨服官廣東，始稍稍購集。廣風氣醇樸，市上時多舊書，而收藏人少，價值亦不甚昂。予歷年既久，因得積有卷冊。歸里後，又復多方購求，漸漸臻富有。

今夏無事，寫成《書目》九卷，共計書若干卷，聊以存諸家塾。其中古籍之流傳，時賢之述作，亦復擇善而從。倘我後人能鑒予苦心，日增月益，保守勿失，不至如煙雲之過眼，斯又不能無望於賢子孫矣。道光十二年太歲壬寅四月五日。（錄自項元勛《台州經籍志》卷十七）

### 筠軒詩鈔自序

余少研經訓，不善吟詩，率爾酬應，以及間有題詠之作，藏諸篋中，不敢出以示人。今秋晴窗無事，偶檢舊稿，頗動雞肋之歎。太史公有言：「食肉不食馬肝，不為不知味。」錄而存之，亦可見友朋之繾綣，山水之流連。染指嘗鼎，藉紀歲月，知無當於大雅之一噓爾。嘉慶廿二年歲次丁丑十月既望，臨海洪頤煊識於粵東鍾官西舍。（錄自洪氏本書卷首，又王綦《台學統》卷九十二）

### 詩經廣詁序

桐城徐樛亭先生宰臨海之明年，一日，出所撰《詩經廣詁》一編以示頤煊。頤煊受而讀之，見其蒐輯詩義，上自《春秋》內外傳、先秦兩漢諸子，以及《齊》、《魯》、《韓》三家，王肅申《毛》之論，孫毓《異同》之評，莫不兼綜條貫；其有《詩》義未盡者，復引宋元明諸家之說以補之，其用意可謂勤矣。

余嘗謂古人讀經之法固貴專精，尤資博覽，非專精無以舉其要，非博覽無以集其成。許叔重撰《說文解字》，《詩》稱毛氏，亦兼及三家；鄭康成作《毛詩箋》，往往據三家以改《毛傳》。他如《白虎通》所引，熹平石經所寫，樊光注《爾雅》，皆是《魯詩》，而不用毛氏；《齊》、《韓》、《詩》亦各有師承章句，是終漢世四家未嘗偏廢，此其學所以大也。迨典午中朝，專立《毛詩》、鄭氏，利祿所在，士爭趨之，而三家始微。梁崔靈恩嘗采三家《詩》作《集注》，今亦不傳。今此書復從千百年後收集散亡，凡古言古字，片語單辭，靡不窮源探委，以期有裨於興觀群怨之旨，厥功甚偉。

頤煊嘗欲撰《詩古義》，而因循未果。今幸觀此書之成，往往有與鄙見相脗合者，心尤愛之，因為之校訂數語，并敘其旨於簡端。先生通籍官戶曹，以迎養乞改令壽昌，調劇臨海，

所至皆有惠政，《記》有曰：「溫柔敦厚，《詩》教也。」知其得力於經義者深矣。道光十年太歲庚寅五月，治愚弟洪頤煊書於小停雲山館。（錄自徐璈本書卷首）

## 宋刻金石錄跋

右趙明誠《金石錄》殘本十卷，是南宋所刻。頤煊以別本參校，如〈漢國三老袁君碑跋〉「安以永平四年薨」，雅雨堂本、《隸釋》本俱作「永元」；《後漢書·袁安傳》：安「章和元年，代桓虞為司徒。和帝即位，……四年春薨。」年號是「永元」，非「永平」。〈漢車騎將軍馮緄碑跋〉云：「袁荊州刺史李隗，南陽太守成晉，太原太守劉瑱，不宜以重論。」雅雨堂本同，《隸釋》本作「劉瓚」，碑文亦作「瓚」，瓚字文理，事見《後漢書·陳蕃傳》，此獨作「瑱」，當是字譌。〈漢司空殘碑跋〉其詞有云「命爾司空，余回爾輔」，《隸釋》本「回」作「同」，《隸續》載碑文亦作「同」，義皆長於此本。餘如〈漢陽朔塼字跋〉「尉府靈壁，陽朔四年始造設已所行」，「靈壁」即「瓚壁」二字假借，雅雨堂本作「壺壁」，誤甚。〈漢從事武梁碑跋〉「故從事武掾，掾字綏宗，掾體德中孝」，《隸釋》本上「掾」字不重，「綏宗」下無「掾」字；此本與碑合。〈漢丹陽太守郭旻碑跋〉「議郎杲及胤孫某」，雅雨堂本「杲」作「某」，校云：「此『某』字，錢鈔作『果』。《隸釋》作『杲』。」以《隸續》所載碑文校之，「杲」本作「柔」，杲、柔字形近；若改作「某」，義全乖矣。如此類甚多，皆足以證近本之失，宜前人收藏之珍祕也。此冊今歸琅嬛館，制府師出以相示，因跋其後。時嘉慶二十三年歲次戊寅九月朔日，臨海洪頤煊謹記。（錄自潘祖蔭《滂喜齋藏書記》卷一）

森按：墨蹟現藏上海圖書館。

## 漢學諧聲跋

右《漢學諧聲》二十四卷，同郡戚鶴泉先生所撰也。先生以名進士出宰河南涉縣，政事之暇，銳志古學，因取許叔重《說文解字》，刪孫氏之附音，祛徐氏之謬說，專求諧聲，以發明漢學。

夫古人制字之旨，依類象形謂之文，形聲相益謂之字，覽其字即可知其聲，審其聲即可通其義，故六書之中，諧聲居其大半。自魏晉以後，反切盛行，學者舍字求音，於是有部分之說，而漢人之家法始變。近儒講求古音，復拘四聲之例，如東江同部也，未聞東聲中任舉一字皆可讀作江音；東董同部也，未聞董聲中任舉一字皆可讀入東韻。且古人假借之字，多於同聲互相通轉，概而求之，則猶未得其精也。

先生是書，不守二百六部之次，專以諧聲相從，而於每字之下，各闡其本音，俾讀者一覽而知諧聲之本，實為前人所未發。其中如論聲音流變，明乎和、桓之通，而難轉為儺、番

轉為播無疑也；明乎祇、振之通，而摯讀若晉、<sup>臨</sup>讀若指無疑也。調之叶同，猶以幪通猛、以槽通棕；鈔之讀臈，猶以操改摻、以禪讀導。許君於聲之有斂侈者，特著「讀若」之例以明之，明示人以諧聲之法，皆得自然之理。書成，郵字問序於頤煊。先生於頤煊為鄉前輩，又家君乙酉同年友也，不敢因固陋辭，因略舉大旨，以跋於左方。若夫考訂之精，駁辨之覈，則有全書在，無俟區區之縷陳焉。嘉慶九年太歲在子，日月會於降婁，同郡後學洪頤煊拜書，時在藁城官舍。（錄自戚學標本書卷末）

### 國朝名人詞翰跋一

右《國朝名人詞翰》二冊，共三十二幀，本吾鄉馮少司寇舊物。公諱甦，字再來，順治戊戌進士。初官雲南司李，值吳逆作亂；擢廣東巡撫，晉刑部侍郎。所著有《滇考見聞隨筆》、《蒿庵詩鈔》，見《四庫全書總目》。此冊是己未迄辛酉公在京師時所題，故鴻博諸公居多。公與余家高王父為總角之交，繼以姻婭，余之曾王妣即公女也。

公後嗣式微，此冊歸余家前篇幅尚多，收藏不謹，僅存此數。高王父諱若皋，字虞鄰，順治乙未進士，官福建福寧道。所著有《文選越裁》、《南沙文集》，見《四庫總目》；事蹟見《大清一統志》云。嘉慶己巳四月二日，臨海洪頤煊敬識。（錄自小停雲山館刊本卷下）

### 國朝名人詞翰跋二

李來泰，字仲章，號石臺，江西臨川人。順治壬辰進士，授工部主事，官參議道。康熙己未，召試博學宏詞，授翰林院侍講。所著有《蓮龕集》十五卷。

姚文燮，字羹湖，安徽桐城人。順治己亥進士，授中書，官雲南楚雄知府。所著有《無異堂文集》、《滇行草》。

彭孫通，字駿孫，號羨門，浙江海鹽人。順治己亥進士，官中書。康熙己未，召試博學宏詞第一，授翰林院編修，官至吏部侍郎。所著有《松桂堂全集》三十七卷。

米漢雯，字紫來，順天大興人。順治辛丑進士，官長葛知縣，行取主事；康熙己未，召試博學宏詞，授翰林院編修，官至侍講。

任克溥，山東聊城人。順治己丑進士，官至刑部侍郎。

張士甄，順天通州人。順治己丑進士，歷國子監祭酒，官至吏部侍郎。

富鴻基，字磐伯，號雲麓，福建晉江人。順治戊戌進士，官至禮部侍郎。

李念慈，字屺瞻，號幼庵，陝西涇陽人。順治戊戌進士，授河間府推官，改新城知縣，再授天門知縣。康熙己未，召試博學宏詞，不第。所著有《谷口山房文集》十卷。

嚴繩孫，字蓀友，號藕漁，江南無錫人。康熙己未，召試博學宏詞，授翰林院檢討，官至左春坊左中允。所著有《秋水集》雜文七卷、詩八卷、詞二卷。

劉如漢，字雙山，四川巴縣人。順治己亥進士，授翰林院庶吉士，餘未詳。

張永祺，字爾成，順天大興人。順治壬辰賜進士第二人，官至國子監司業。

毛奇齡，字大可，號西河，浙江蕭山人。康熙己未，召試博學宏詞，授翰林院檢討。所著有《西河合集》四百餘卷。

胡會恩，字孟綸，浙江德清人。康熙丙辰賜進士第二人，官至刑部尚書。所著有《清芬堂存稿》八卷。

周之麟，字石公，浙江蕭山人。順治己亥進士，官至太常寺卿。

李因篤，字子德，又字天生，陝西富平人。康熙己未，召試博學宏詞，授翰林院檢討。所著有《受祺堂詩》三十四卷。

尤侗，字展成，號悔庵。江南長洲拔貢生，官永平府推官；康熙己未，召試博學宏詞，授翰林院檢討，官至侍講。所著有《西堂全集》五十四卷、《餘集》七十卷、《鶴棲堂稿》十卷。

杜臻，字肇余，浙江秀水人。順治戊戌進士，授翰林院編修，歷遷吏部侍郎，官至禮部尚書，卒賜祭葬。所著有《閩粵巡視紀略》一卷。

徐元文，字立齋，江南崑山人。順治己亥賜進士第一人，授翰林院修撰，官至文華殿大學士，謚文肅。所著有《含經堂集》三十卷。

王颺昌，字子言，山東高密人。順治戊戌進士，官至禮部侍郎。

彭定求，字勤止，又字訪濂，江南長洲人。康熙丙辰賜進士第一人，授翰林院修撰，官至侍講。所著有《南畝文集》十二卷。

黃機，字次辰，浙江錢唐入。順治丁亥進士，官至文華殿大學士，謚文僖。

曹鑑倫，字彝士，浙江嘉善人。康熙己未進士，官至吏部侍郎。

高層雲，字謨園，江南華亭人。康熙丙辰進士，授大理評事，官至太常寺少卿。

查培繼，字王望，浙江海寧人。順治壬辰進士，授東莞知縣；行取戶部主事，歷給事中，官至江西九饒南道。

吳正治，字賡庵，湖廣江夏人。順治己丑進士，官至大學士，謚文僖。

陸棻，字義山，浙江平湖人。康熙丁未進士，官內閣典籍。己未召試博學宏詞，授翰林院編修，官至內閣學士兼禮部侍郎。所著有《雅坪文稿》十卷、《詩稿》四十卷。

孫在豐，字屺瞻，浙江德清人。康熙庚戌賜進士第二人，歷工部侍郎，以閱視河工鑄秩。尋復官，至內閣學士兼禮部侍郎，卒賜祭葬。

邵吳遠，字戒三，後改名遠平，浙江仁和人。康熙甲辰進士，歷光祿寺少卿；己未召試博學宏詞，授翰林院侍讀，官至少詹事兼侍講學士。所著有《續弘簡錄》四十二卷、《戒庵詩存》一卷。

蔣伊，字謂公，江南常熟人。康熙癸丑進士，官至河南提學副使。所著有《萬世玉衡錄》四卷。

伊闢，字翕庵，山東新城人。順治乙未進士，官至雲南巡撫。

錢中諧，字宮聲，江南吳縣人。順治戊戌進士；康熙己未，召試博學宏詞，授翰林院編修。

方象瑛，字渭仁，浙江遂安人。康熙丁未進士，官中書。己未召試博學宏詞，授翰林院編修，官至侍講。所著有《健松齋集》二十四卷、《續集》十卷。

以上三十二人，或名在國史，或事具傳記，其豐功偉績，文采風流，皆卓然不朽，無煩綴述。今略附爵里於後，以待後人之考證。甲戌十月二十七日，洪頤煊又記。（錄自小停雲山館刊本卷下）

### 孫淵如觀察往還書札跋

淵翁凡與人往還書札，有名人皆留存；僅裝朱太傅、王蘭泉、錢辛楣三冊，餘俱積諸巨簾。一日啟視，頗動雞肋之嘆，余因隨手乞得此。傳之百餘年，亦可寶也。倦舫記。（錄自《文瀾學報》二卷一期，項士元〈小停雲山館金石書畫過眼錄〉）

### 文林郎陝西扶風縣知縣宋君墓表

君諱世榮，字貞勛，姓宋氏，确山其別號也，世為臨海人。父某，字鑑溪，以積德聞於鄉；年四十無子，禱於白衣大士而生君。君少穎悟，讀書過目不忘，作文勃勃有生氣，諸老宿咸相驚異。年十五，彭文勤公視學至台，拔補弟子員，一時有神童之目；乾隆戊申舉於鄉。君素工書法，考取咸安宮教習；甲寅九月，補教習。君先後在京，文名籍甚，館大興相國朱文正公第，門下瑰偉之士咸相與往來論交。君七應禮部試，五薦而終不售。嘉慶九年甲子，教習期滿引見，以知縣用。南歸，閉門授徒，考訂經史，搜集鄉邦文獻，意灑如也。

甲戌，選授陝西扶風縣。地當川藏孔道，供應浩繁，辦差夫馬、鋪設油炭等項，俱出里下紳士董其事，按畝攤派，名曰公局。歷任需索贏餘，以致劣紳、門幕狼狽為姦。君至，悉裁陋規，不妄受民間一錢。時秦、豫教匪初定，各省清查保甲，州縣多以獲盜升擢。境內有

持齋禮佛為怨家所首者，大憲飛札飭拏；君捕獲，鞫之，皆良民，申釋弗顧。扶風文風舛陋，君擇其秀者入書院，厚給膏火，月局試之，自是有登科者。丙子、戊寅連充陝西鄉試同考官，得士最盛。城垣日久坍塌，或勸請帑，君曰：「是子孫之累也。」乃率眾捐修，城外渭水得復舊流，民咸安居。

君長於聽訟，剖決如流，鄰邑發審案件絡繹不絕。暇則論文賦詩；重脩《扶風縣志》，刊刻《台州叢書》。又念臨海縣學士子鄉試，赴省維艱，餽助路費。又捐銀四百兩，存商生息，以作永久之計，多士賴之。

君素有痰疾。庚辰冬，以積勞復發，遂決意去官歸；道光元年辛巳五月初八日抵家。君方自幸半生旅宦，乍賦倦游，家中藏書萬餘卷，金石鼎彝，璀璨滿目。日與故人鄰戚歡然道故，僉謂君當享優游之福，不意遽嬰末疾，以是年七月十六日終於正寢，年僅五十有七。惜哉！

君娶陳氏，乾隆戊子科舉人文烜公女，有婦德。男三人：長曾昀，廩貢生；次經畬，嘉慶癸酉拔貢，甲戌朝考二等，選授樂清訓導；次倫疇，太學生。孫十一人：珣、衛、璵、璥、璜、璜、璜、璜、璜、璜、璜，皆能讀書承家學。

君所著已刊者，有《儀禮古今文疏證》、《周禮故書疏證》、《蘭行紀程》、《扶風雜詠》、《漳川詩徵》、《扶風縣志》、《确山駢體文》、《紅杏軒詩鈔》。未刊者有《詁經文字古義通釋》、《台郡識小錄》、《古銅爵書屋金石文》、《确山帖體詩》、《台詩三錄》、《愚得筆記》，藏於家。

余與君年相若，居相近，又志趣相同。少年竟夕過從，抵掌劇談，鄰里驚愕。壬申同在京謁選，君連遭鉞羽，豪氣全消，余亦自傷困頓。及戊子冬，余自廣東引疾歸里，君已早返道山。每追念曩時舊游，不覺神傷累日。君以壬午年閏三月初二日葬於浮岡奧門前山父墓之東。庚寅夏，其嗣君以狀來乞文，余不敢辭，因撮敘其大略，以為墓表。前廣東候補直隸州州判，署新興縣知縣，愚弟洪頤煊拜撰。（錄自王棻《台學統》卷九十五）

## 參考書目

- 陳鴻森〈洪頤煊年譜〉附〈著述考〉，2009年，《中央研究院歷史語言研究所集刊》80本4分。  
翁方綱〈平津讀碑記序〉，洪頤煊《平津讀碑記》，《傳經堂叢書》本。  
《續修四庫全書總目提要》，1996年，濟南：齊魯書社。  
武內義雄《論語の研究》，《武內義雄全集》本，1978年，東京：角川書店。

